



*Sabtu, 09 September 2023*

**Ogen : 2 Timotius 2:5**



**Ikut I bas Perlumban**



**E**rlumba ertina erusaha gelah jadi si arah lebe. Perlumban e erbahanca meriah siakap. Misalna bas perayaan kemerdekaan megati iban perlumban balap lari karung, erlumba erjujung rsd. Sinatap-natap meriah iakapna, si erlumba pe erpala-pala segelah jadi nomor sada ras dat upah. Sebab memang lit upah sinimai i bas kerina perlumban.

Tapi labo terjeng bas doni enda kita perlu erlumba. Doni enda masap nge dengen paksa geluhta ersibar nge. Lit si rasa lalap siman cikepenta, emekap kegeluhen ras Dibata. Guna ndatken kegeluhen si rasa lalap e me maka kita perlu ikut i bas perlumban kiniteken, bagi sinikataken Rasul Paulus bas ogenta enda. I bas nggeluhken kegeluhen selaku gambar diri Dibata bas geluh enda, salah sada anding-anding siipake Paulus eme desken sekalak singikuti perlumban olahraga. Maka adi ersura-sura ia menang, ia arus tutus ersikap bagepe iikutina peraturen-peraturen siberlaku asum pertandingan e. Sebab e me sijadi sukat-sukat kemenangenna. Geluh kalak Kristen ngelumbaken kiniulin ras kebenaran si tetap erpalasken Kata Dibata. Mbue kiniulin bas doni enda, tapi labo kerina si mehuli e benar. Nampati kalak bas kesusahen benar, tapi adi ulih nangko nge si bereken labo benar. Em siman lumbanken kita bas geluh enda dengen si atan ngaloken rudang-rudang kegeluhen si rasa lalap ibas Tuhan nari.

Erpala-palalah nemaiken kiniulin ras kebujuren wari lepas wari. Jadilah rusur silebena erbahan mehuli, *sebab kalak si merdang alu iluh mambur, rani me ia alu ersurak-surak (Msm.126:5).*

*Iktulah bas perlumban kiniteken, Dibata nari kap upahita*